

# BILDUR

*Arkaitz gaiñean ago,  
zorioneko lagun,  
mundura begira;  
zer aduzko indarrek  
samindu deuk biotza  
il gogorkerira...?*

*Zer jazo dok lurrean...  
Jainkoari eskua  
kendu nai izateko...?  
Gizona, naiko al az,  
bizitza arazoak,  
zuzen, argitzeko...?*

*Baiña zer dok burruka au...?  
Gizonak elkar joten,  
zer jabilzak ilten...?  
Zeren bildurra daukak,  
lagun minberatua,  
odolak lertuten?*

*Leoién ao zarrak  
ez najok bildurtuten  
mendi barrenian;  
gizonaren ezpatak  
ez najok ikaratzén  
espetxe aurrian.*

*Egille Almentsuak,  
ni sortu ninduanak  
jamostek bildurra;  
betiko bizitza  
maitasunez betea,  
neuk galdu bearra.*

PAULIN

# ORBELAK LEZ

Aizeak daroazan orbelak lez  
zirimolka, basaz zipriztinduak  
ta, bertanbera jausiak lurrean,  
bizidunen oinkada, ostikopez.

Tamalgarria da bai ikustea  
ainbesterañoko itsutasunez  
inguratzen gaitun gizartea  
ain dollor ta zeken, garraztasunez.

Gogo zitalezko gogortasunez  
biotzak dagoz deungaki izoztuak,  
erakutsiz euren errenkurea  
gozotasunik barik, etsipenduak.

Azurretarraño dago sartua  
munduaren ustel-sunda, kiratsa;  
ibaiak, lats, errekak ta bizitza  
bera be, errorraño ondatua,

Gure biotzak ez, ez dira maitezkoz  
bizi. Ez dira ederrik apaintzen  
ta, alai, udabarritar soiñekoz,  
ez dira usaintsu loraburutzen.

Negute edurtu izotzgarriaren  
kopeta zimurtuaren betoskoz  
antzeratzen dira, illun baltzaren  
egun gautuen asarredun margoz.

Zer, zer gertatzen da gure errian,  
betiko eztabada, gutarreen,  
zer gertatzen da zer gure artean  
gorrotogarrizko lorrinkerian?

Erauntsi gaingoratuaren antzera  
erasotzen dauku bai mendebalak.  
Baiña, nundik norakoak ete dira  
orren buru, erro eta magalak?

**Muniategi-tar Sabin**